

Communicaziun als meds da massa – Cussegl dal public SRG.R – 02/2018

RTR – Ils rapports davart No Billag èn stads neutrals e professiunals

(SRG.R) En sia seduta dals 9 da matg ha il Cussegl dal public SRG.R mess il focus sin il di da votaziuns dals 4 da mars. En il center da quest di è stada la votaziun No Billag. Il Cussegl dal public ha analisà schebain RTR haja rapportà quest di a moda correcta e professiunala ed è vegnì a la conclusiun che quai saja stà il cas. Las infurmaziuns èn arrivadas svelts, ils rapports èn stads corrects ed ils collavurators na sajan betg stads memia emoziunals. Ulteriurs temas da la seduta èn stads il «Maraton da skis engiadinais» ed il «Surselva Jam» a Breil.

Ultra dal focus sin No Billag haja RTR er rapportà a moda adequata da la votaziun davart il nov urden da finanzas 2021 e da las votaziuns regiunalas. Che questas votaziuns hajan quest di survegnì pli pauc spazi saja giustifitgà. La votaziun davart No Billag saja stada da grond'impurtanza per l'entir Grischun e surtut per ils rumantschs. Il Cussegl dal public ha constatà d'avair survegnì bunas impressiuns davart l'atmosfera tar ils iniziants ed ils adversaris da No Billag, saja quai via radio, via televisiun u er en la rait. Il Liveticker sin rtr.ch e la charta geografica cun ils resultats da mintga vischnanca han persvadì. In punct da critica ch'il Cussegl dal public ha constatà pertutga ina in'intervista cun Martin Candinas live or d'ina ustaria. Là saja la qualitad dal tun stada uschè mala ch'ins n'haja strusch chapì in pled. Tut en tut drizza il Cussegl dal public da la SRG.R in grond compliment als collavurators e las collavuraturas da RTR per ils rapports dals 4 da mars.

50avla ediziun dal Maraton da skis engiadinais

Las istorgias avant e durant il Maraton da skis engiadinais han plaschì bain al Cussegl dal public. Il public haja pudì accompagnar divers curridurs e quai haja dà in purtret fitg cumplexiv dal maraton. Ultra da quai hajan las infurmaziuns ord l'archiv da RTR cumpletta il purtret, er en connex cun il giubileum dal maraton. Tge ch'è crudà si al Cussegl dal public è ch'i ha surtut dà intervistas cun personas nunenconuschentas. Quai ha RTR dentant fatg sapientiv uschia. L'idea saja da betg adina mo sa focusar sin personas enconuschentas.

10avla ediziun dal Surselva Jam a Breil

La reclama per quest'occurrenza ch'è vegnida emessa via livestream saja stada fitg vasta e sufficiente. L'emissiun haja gi in bun ritmus, spontan, plain vita e surtut ils commentaris da l'expert sajan stads fitg variants. Vers la fin eran ils commentaris magari er repetitivs. Quai saja dentant chapaivel cunquai ch'ils sigls sajan er adina puspè ils medems. La tavla da puncts haja dà in character spontan e famigliar, ma il dischavantatg da questa tavla en furma da palpìri saja ch'i dettia er sbagls e ch'ins na possia betg dar ina survista

cumplina u cumparegliar ils resultats da las diversas gruppas. En general ha l'emissiun sco tala plaschì bain, ma il Cussegl dal public è sa dumandà schè bain i fetschia senn da far talas stentas per emetter d'ina occurrenza uschè pitschna. La directura da RTR, Ladina Heimgartner, ch'è stada preschenta a la seduta, ha argumentà che gist talas acziuns tutgian tar il service public. I saja impurtant da rapportar d'eveniments da nischa pli pitschens e betg mo dal mainstream.

Il proxim inscunter dal Cussegl dal public è ils 12 da settember a Mustér. Fin lura han las commembras ed ils commembers da quest gremi l'incumbensa d'observar l'emissiun «La Canorta» che prepara ils chors per la festa da chant a Chiavenna, las medias socialas en general e la pagina d'internet rtr.ch.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79 u mail: sandra.carisch@srgr.ch

Cuirà, ils 11-5-2018